

JAVI VAZQUEZ EZPITSUA TALDE EKOLOGISTAKO ORDEZKARIA

«Erakundeek beste aldera begiratu dute salaketak egin ditugunean»

Zuloko-Ibarreta hezegunean hirigintza proiektu erraldoia egingo du Barakaldoko Udalak. Ezpitsua talde ekologistak sarritan salatu du proiektu hori aurrera ateratzeko lege hausteak egiten ari dela Udala, eta, orain, Europako Batasunak espediente ireki du.

Asier Iturriagaetxebarria | BILBO

Europako Batasunak (EB) Espainiako Gobernuaren kontrako espediente zabaltzen du, Barakaldoko Zuloko-Ibarreta hezegunea dela-eta izan duen jarduerarengatik. Orain, benetan zer gertatu den jakin nahi du EBk; Ezpitsua plataforma ekologistakoak gustura daude, gaia aztertzen hasi direlako.

■ **Urteetako borrokaren ostean, badirudi norbaitek jaramon egin dizuela.**

Bai, berandu bada ere, ondo dago. Luzaroan egon gara esaten erakundeek beste aldera begiratzen zutela guk zer edo zer salatzen genuenean; baina, orain, badirudi gauzak aldatzen ari direla. EBren erabakiaren ostean, Espainiako Kosta Zuzendaritzan ipini genuen salaketa ere aztertuko dutela dirudi. Guk sarritan esan dugu Barakaldoko Udala lege hutsune batez aprobetxatu dela; lehenengo, egiten zuela, eta gero gerokoak. Udalak hori egiten zuen bitartean, ardura bata besteari pasatzen ibili dira beste erakunde guztiak. Baina egia da guk salatu ditugun lege hausteak agerian geratzen hasi direla orain.

■ **Hala ere, egindako lanak izan du bere eragina; izan ere, Ikea multinazionalak esan du, barakaldarrek hala gura badute, beraiek Zuloko-Ibarretatik alde egingo dutela.**

Hori ez dago batere argi. Gaur lanak egiten ari dena Arcona Iberica enpresa da, eta, hain zu-

MONIKA DEL VALLE / ARGAZKI PRESS



ERAKUNDEEN JARRERA

BARAKALDOKO UDALA

«Lege hausteak zeudela salatu dugunean, erakundeek beste aldera begiratu dute, mesedeak zor dizkietelako elkarri»

«Barakaldoko Udalak egin duena da zerbait zaindu behar zela jakin duenean, hondatu, eta, gero, zereginik ez dagoela esan»

zen, jakin dugu enpresa horretako eta Ikeako arduradunek lotura estu-estua daukatela. Jesus Trillo Figueruak, adibidez, batzuetan Ikearen izenean berba egin du, eta, beste batzuetan, Arcona Ibericarenean. Daukan izaeragatik, jendaurrean horrelako esaldi politikak esaten ditu Ikeak, baina, atzetik, beste asmo batzuk dauzka.

■ **EBk espediente zabalik**

badauka ere, Barakaldoko Udalak —Zuloko-Ibarretako proiektuaren sustatzaile nagusia— garrantzia kendu dio gaiari.

Egia da Diego Moyano zinegotziak esan zuela EBren erabakiak ez zeukala eraginik, eta, horretarako, orain urte bat EBko Ingurumen arduradunak eginiko adierazpenak erabili zituen. Baina Moyanok ez dauka

kontuan batzordeak erabaki beharko duela zigorra ipini edo ez, eta ez pertsona horrek.

■ **Zuloko-Ibarretaren inguruan Barakaldoko Udalak izan duen jarrera inposatzailea izan dela salatu dugu.**

Inposatzailea izateaz gainera, ezkutuan ibili dira hasiera-hasieratik. Kontu egizu; gu 2000. urteko amaieran hasi ginen


mugitzen gai horren inguruan. Ordurako, Udalak Zuloko-Ibarreta ingururako plana egin zuen; bere erara, PSE-EE nahikoa delako Udalean bere erabakiak hartzeko. Plan hori egitean, arau guztiak apurtu zituen Udalak: lur eremu hori lindanoz kutsatuta zegoen, eta, gainera, balio ekologikoa zuen. Ur Zuzendaritzak egindako txosten baten esaten zen inguru hori berreskuragarria zela, baina hori ere ez zion jaramon egin Udalak. Ur Zuzendaritzak lana egiteko baimena eman zuen hezegunea babesteko zen baldintzarekin. Alferrik, Udalak hezegunea estali baitzuen berehala. Horixe egin du beti. Ingurumen aldetik zer edo zer zaindu beharrekoa zela esaten zuen azterketa bat agertu baino lehen, apurtu egiten zuen, eta kito. Horrela, arazoa gainetik kentzen zuen.

■ **Normala ere bada Udalak jarrera hori izatea, Carlos Pera alkateari askotan entzun diogulako Zuloko-Ibarretako hezeguneko dela bere proiektu nagusia.**

Beti esaten du Zuloko-Ibarretako Megapark proiektuak ikaragarriko eragina izango duela Barakaldoko garapenean, baina ez dakit bere garapen pertsonalak ez ote dion gehiago ardura. Espainiako Kosta Zuzendaritzakoekin biltzera inoiz Madrilera joan garenean, esan digute presio ekonomiko handia dagoela gai honen inguruan. Gure ustea da erakunde guztiek elkarri mesedeak zor dizkietela, eta, Zuloko-Ibarretaren kasuan, beste aldera begira egon direla, Barakaldoko Udalak proiektua aurrera ateratzeko.

■ **Hezeguneko balio ekologiko handia zeukan?**

Zeukan balioa jakiteko azterketa egin genuenean, harrituta geratu ginen, desagertzeko bidean dauden hainbat espezie bertan bizi zelako. Gainera, kontuan izan behar da Ezker aldeko azken hezegunea zela.

LANDA
Jatetxea eta ostatua

Bertako sukaldaritza lantzen da.

Menua 8 € eta astebukaeretakoa 15 €.

Logelak ere baditu; gela atseginak, bainu indibiduala eta Tb-an, Canal + a duzularik.

27 € pertsona eta 46 € bikotea. Ez dugu astean zehar itxen.

